

Krafa um hækkun á framlögum til NPA samninga

Til : Póstlisti Mosfellsbæjar
Frá : hjortur@npa.is <hjortur@npa.is>
Heiti : Krafa um hækkun á framlögum til NPA samninga
Málsnúmer : 202102311
Málsaðili : NPA miðstöðin svf.
Skráð dags : 16.02.2021 14:54:11
Höfundur : hjortur@npa.is <hjortur@npa.is>

Viðhengi [2021.01 - Útreikningur á jafnaðartaxta í NPA fyrir 2021.pdf](#)[2021.01 - Útreikningur á jafnaðartaxta í NPA fyrir 2021.pdf](#)
[image001.png](#)[image001.png](#)

Berist til:

Bæjarráð Mosfellsbæjar

Þverholti 2

270 Mosfellsbæ

Kópavogur, 16. febrúar 2021

Þann 1. janúar sl. hækkuðu kjarasamningar á almennum vinnumarkaði og þar á meðal kjarasamningar við aðstoðarfólk í NPA (notendastýrð persónuleg aðstoð). Umsýsluaðilar NPA samninga bera skyldu til að standa skil á kjarasamningsbundnum réttindum NPA aðstoðarfólks og fylgja launahækkunum þeirra. Í því sambandi er vísað til 3. mgr. 11. gr. laga nr. 38/2018 um þjónustu við fatlað fólk með langvarandi stuðningsþarfir og 2. mgr. 3. gr. og 1. mgr. 9. gr. reglugerðar nr. 1250/2018 um NPA. Jafnframt er afdráttarlaust vísað til þess að NPA notendur og umsýsluaðilar skulu fara eftir ákvæðum kjarasamninga við framkvæmd NPA í samstarfssamningi NPA miðstöðvarinnar og Mosfellsbæjar, sbr. einkum 4. kafla samningsins.

Forsenda þess NPA notendur og umsýsluaðilar geti framfylgt kjarasamningum er sú að sveitarfélögin geri það einnig. Þess vegna er skyldan til að fara eftir ákvæðum kjarasamninga aðstoðarfólks framlengd yfir á sveitarfélög, bæði í regluverkinu sem gildir um NPA og í samningum um þjónustuna.

Í V. kafla nefndrar reglugerðar um NPA er þannig fjallað um fjárhagslega framkvæmd þjónustunnar. Í 16. gr. segir að framlagið skuli „*taka mið af kjörum aðstoðarfólks samkvæmt gildandi kjarasamningum hverju sinni*“. Í ákvæði 10.1 í samstarfssamningi NPA miðstöðvarinnar og Mosfellsbæjar segir jafnframt að „*fjárhæðir greiddar fyrir hverja vinnustund skulu vera í samræmi við ákvæði kjarasamninga umsýsluaðila sem gilda á almennum vinnumarkaði og taka breytingum í samræmi við kjarasamningsbundnar launahækkningar*“. Hér er því ekki verið að horfa til kjara annarra stétta eða almenna launaþróun, heldur beinlínis vísað til kjara aðstoðarfólks, eins og þau eru hverju sinni. Skylda Mosfellsbæjar til þess að lúta ákvæðum kjarasamninga NPA aðstoðarfólks við útreikning á framlagi sínu til launakostnaðar í NPA er þannig afdráttarlaus og skýr.

Meðfylgjandi eru útreikningar NPA miðstöðvarinnar á uppreiknuðum lágmarkstöxtum NPA samninga frá 1. janúar 2021, með tilliti til kjarahækkana um áramótin ásamt forsendum og skýringum. Vakin er athygli á því að ekki er tekið tillit til fyrirhugaðrar styttingar vinnuvikunnar sem mun leiða af sér frekari hækkun á taxta á árinu. Taxtarnir eru eftirfarandi:

5.567 - Grænn taxti sem gildir fyrir fulla NPA samninga sem eru án hvíldarvakta.

5.070 - Gulur taxti sem gildir fyrir fulla NPA samninga þar sem unnt er að nýta hvíldarvaktir.

5.362 - Blár taxti sem gildir fyrir alla aðra NPA samninga, þ.e. samninga sem ekki kveða á um næturvaktir.

Mosfellsbær hefur fram til þessa ekki staðið við framangreindar skyldur sínar um að miða framlög sín við ákvæði

kjarasamninga aðstoðarfólks, þrátt fyrir ákvæði samstarfssamnings og skýra lagaskyldu. NPA miðstöðin hefur ítrekað vakið athygli á þessu en við því hefur ekki verið brugðist enn sem komið er. Þá hefur Mosfellsbær ekki lagt fram útreikninga eða rökstuðning fyrir gildandi framlögum bæjarins til NPA og hvernig framlagið geti staðið undir kjarasamningsbundnum skuldbindingum gagnvart NPA aðstoðarfólki.

NPA miðstöðin gerir kröfu um að Mosfellsbær uppfæri taxta sína til NPA samninga þegar í stað og að taxtahækkanirnar taki gildi frá síðustu áramótum. Telji Mosfellsbær sig ekki þurfa að hækka taxtana eða telur rétt að hækka taxtana um lægri upphæð en fram kemur í meðfylgjandi útreikningum NPA miðstöðvarinnar óskast það rökstutt sérstaklega. Telji Mosfellsbær að framangreindir útreikningar NPA miðstöðvarinnar séu of lágir er einnig óskað eftir staðfestingu bæjarins á því.

Verði ekki brugðist við erindinu mun NPA miðstöðin láta reyna á formlegri innheimtu á eftirstöðvum þess mánaðarlega framlags sem NPA notendur hjá miðstöðinni eiga inni hjá Mosfellsbæ vegna kjarasamninga NPA aðstoðarfólks og kjarahækkana á árinu. NPA miðstöðin mun leita liðsinnis Eflingar og Starfsgreinasambandsins í þeim aðgerðum. Má búast við slíkum aðgerðum innan þriggja vikna frá dagsetningu þessa erindis.

Vinsamlegast staðfestið móttöku á erindinu.

Bestu kveðjur,

HJÖRTUR ÖRN EYSTEINSSON

Framkvæmdastjóri



**Samvinnufélag fatlaðs fólks með
notendastýrða persónulega aðstoð**

NPA MIÐSTÖÐIN

Urðarhvarf 8, 203 Kópavogur

Sími +354 567 8270

www.npa.is

[Facebook](#)